

痢

證

匯

參

痢證滙纂卷之二

海虞吳道源木立纂輯

同里 王式金聲谷評定

劉文思庭輝纂訂

門人 王天瑞希范 同校

龔錫勇天表

外感痢

外感之痢。身痛頭疼。感於太陽。嘔惡飽懣。感於陽明。

前諸賢論  
論中已悉

病之大概  
絃更將外  
感內傷及  
三陽三陰  
燥火濕火  
等條分攪  
和言之益  
便閱者了  
了臨症時  
無游移之  
弊  
此條爲治  
測先著

寒熱往來感於少陽三陽不解傳入於裏在傷寒曰  
傳經在痢疾曰風邪內縮從陽經傳入於裏也。氣  
不足乘虛感入鬱遏營衛營泣衛鬱則傳腸胃則水  
穀不化蓋血與糟粕互相蒸釀而成痢宜先治外邪  
使之從表面出凡痢必先表散也。活人書云外感痢  
與傷寒同法宜分三陰自利三陽自利如不先行疏  
散竟以六腑積滯通之必致風暑之邪乘虛內縮利  
傷元氣而死。夫外感之邪未經表散陷入腸胃與濕

熱之毒相併而成痢也。法當先散表邪。醫通云。賊風虛邪。陽受之。則入六腑。言六腑之經氣受於外。則營衛氣塞。身熱不時臥。上爲喘呼。邪併於氣之象也。又云。下痢脈反弦。身熱發汗者。自愈。其人面少赤。身有微熱。下利清穀者。必發鬱冒。汗出而解。治法彙云。脈浮數。身痛寒熱者。挾外感。敗毒散主之。初痢脈浮數。頭不痛。但寒熱後重者。小柴胡湯主之。皇甫中。指掌云。外挾風寒者。宜汗之。敗毒散是也。或蒼朮防風湯。

惡寒發熱者。神朮湯。風邪乘虛入腸胃而下清血者。  
胃風湯。婁全善綱目云。下痢發熱惡寒。身首俱痛者。  
此爲表證。宜汗之。赤水元珠云。夫痢有從外感而得  
者。須分六氣之異。外旣受傷。腸胃必然鬱結。遂成赤  
白之痢。法當隨其寒熱而疏散之。龔西園醫學源流  
云。下痢挾風邪。惡寒發熱。遍體疼痛。表證也。速宜汗  
之。神朮散之屬。後用治痢藥。如風邪乘虛入腸胃者。  
下注清血。胃風湯。遍身發癢者。陽毒也。亦宜汗之。乾

坤生意云。痢疾之證。須分別陰暑陽暑之源。其邪必兼乎濕。夫陰暑由於人之陽氣虧。加以貪涼喜冷。鬱折生陽。故主溫。陽暑由於人之伏熱。阻氣化濁。則重於清。其邪之來也。如水之流。臟腑一有罅隙。則乘虛而着。故有在氣在血之分。傷腑傷臟之異。若表邪鬱結。而氣機下流不息。宜敗毒散。發其表裏之壅滯也。已任編云。下痢發熱者。疫毒也。宜敗毒散。後服調金湯。加柴胡。熱甚用芩。不用連。恐遏邪於內。而不得洩。

戴元禮證治要訣云。外感暑邪而痢者。自汗發熱。面垢嘔逆。渴欲飲水。腹痛悶滿。小便下利。法當清暑疏散。宜香薷飲。或霍香正氣散。赤利發熱者。宜敗毒散。證治彙補云。凡痢初起發熱者。帶表證也。宜汗之。所謂風邪內結。汗之是也。吳鶴臯云。太陽合病。自下痢者。宜發散。河間保命云。表邪留積於脾。而爲水瀉。有厥陰經動。下痢不止。其脈沉而遲。手足厥冷。下痢膿血。宜麻黃湯。或小續命湯。汗之。法曰。如有表邪。縮於

內當散表邪而痢愈矣。又云身冷自汗宜溫補風邪。內縮宜汗之。喻氏法律云外感三氣之熱而成下痢。其必從外而出之。故下痢必從汗先解其外。後調其內。首用辛涼以解其表。次用苦寒以清其裏。一二劑愈矣。失於表者外邪但從裏入不死不休。故雖百日之遠仍用逆流挽舟之法引其邪而出之於外則死證可活危證可安。金匱有云下痢脈反弦發熱身汗者自愈。今因逆挽之勢逼其暫時燥熱頃之邪從表



出熱自無矣。久痢陽氣下陷。皮膚乾涸。斷然無汗。今以逆挽之法。衛外之陽。領邪氣同歸於表。而身有汗。是以腹中安靜。而其病自愈矣。或有驟受暑之毒。水穀傾囊而出。大渴飲水自救。此則腸胃爲熱毒所攻。更用逆挽之法。迂矣遠矣。

### 內傷痢

內傷之痢有三。有七情內傷。勞力內傷。飲食內傷。雖屬一證。而治各不同。七情內傷之痢。初起必先見飲。

明辨證也

食難化。後復大便秘。不實時泄。經久不愈。漸變膿血。卽所謂脾泄痢是也。皆因憂愁思慮傷脾。脾陰受傷。則轉輸之官失職。日進飲食不能尅化。停積胃中。氣至其處。則凝血流。其處則泣氣凝。血澀與飲食互相膠固。則脾家壅滯而成痢矣。脈必重虛。虛大傷氣。虛細血虧。虛弦有胃。尙可挽回。弦而無胃。必死無疑。治宜查朮膏兼補兼消。次用參苓白朮散。元氣下陷者。補中益氣湯。久泄虛寒。理中湯。勞役內傷之痢。起於大

內傷病中  
惟由於行  
房不節者  
爲最重  
疾者其  
旃

扶元固本  
最爲要着

勞之候。下痢純血。腰背皆痛。四肢倦怠。飲食漸減。節  
勞稍緩。勞重卽發。此勞役內傷之病也。或起居不謹。  
或飢飽不均。或負重遠行。或過飽而行。房營傷胃。損  
而飲食勞傷之病成矣。脈必見虛損。虛數傷血。虛大  
傷氣。虛緩者生。虛實者死。治宜當歸活血湯。去瘀生  
新。次用當歸補血湯。調養氣血。治惟扶元固本。切忌  
兜瀉。苦寒。趙養葵曰。寒毒內傷。口渴而喜熱飲。小便  
清長。身不熱。腹喜熱手熨者。此寒毒內傷下痢也。治

此處數行  
所以治內  
傷痢者醇  
矣備矣

宜薑附理中湯溫之。至於初痢本是熱證遷延日久。  
漸變虛寒理宜別治。竟作虛看。須用補中益氣倍加。  
參芪溫補。飲食內傷之痢。初起胸滿食減。大便殭泄。  
或下膿血。痛而欲痢。痢後痛減。此飲食內傷之痢也。  
皆因胃強脾弱。能納而不能化。或過食傷脾。脾陰受  
損。血凝氣滯。停積於中。互相膠結而成。痢脈多滑大。  
或見弦緊。滑大實積。弦小虛滯。治宜養胃湯。次用異  
功散。食積下痢。胸滿腹痛。膨脹不食。飲食不化。宜保

和丸內傷。休息痢。無外感之邪。非暴發暴痢之證。皆因脾胃虧損。則成積痢。發無定期。經年不愈。此內傷休息痢也。或因勞心過度。思慮傷脾。或因寒涼不謹。腸胃受傷。此內傷七情休息痢也。其脈弦細。思慮傷脾。若見虛大。脾氣虧損。或見絀澀。脾血有傷。或見沉弦。食積傷脾。或見遲弦。寒涼傷損。治法。思慮傷脾者。歸脾湯。飲食傷脾者。枳朮丸。或大安丸。寒濕不禁者。理中湯。

要訣

三陽自利

頭痛身熱。或寒熱如瘧。嘔惡不。滿。不思飲食。腸胃窘痛。下痢膿積。其脈浮弦。爲風。浮緊。爲寒。浮數無力。爲暑。浮濡無力。爲濕。此屬三陽自利。宜用羌活湯。或敗毒散。先疏在表之邪。俟汗透身涼。議用香連導滯丸去積。

三陰自利

下利脈沉微。瀉滑。或虛微無力。惡心嘔吐。乍寒乍熱。

三陰治痢  
如此臨症  
者審之

寒濕痢見  
得清

痢證治法

卷二

七

四肢厥冷。所去如魚腦豆汁。或如屋漏水者。此三陰  
自利也。宜桂枝湯解表。後用理中湯溫裏。或四逆湯。

### 寒濕痢

初起惡寒發熱。身痛頭疼。嘔吐不食。不渴。痢下膿血。  
或下黑水。腹反不痛。此寒濕之證也。身痛頭疼。感於  
太陽。嘔吐飽悶。感於陽明。寒熱往來。感於少陽。三陽  
不解。傳入於裏。左脈浮緊。太陽風濕。右脈浮大。陽明  
寒濕。脈見弦緊。少陽寒濕。宜用敗毒辛溫散表。嘔吐

的麻語

飽悶脈長者葛根平胃散。和胃寬胸。小水不利。散表利濕。用五苓散。大抵早用寒涼。致寒濕不散。抑遏內縮。仍當先散表邪。使之從表而出。故寒濕之痢必先表散也。

### 濕火

濕熱之證。初起先瀉。後痢。濕氣勝。腹不痛。熱氣勝。腹大痛。肛門重墜。後重裏急。此外感濕熱之痢也。惡寒發熱。身首俱痛。濕熱傷太陽也。嘔而不食。目疼口渴。

同一火也  
而濕燥有  
分故治法  
亦異



濕熱傷陽明也。往來寒熱。脇痛。口苦。濕熱傷少陽也。三陽不解。濕熱內縮。傳裏而成痢矣。脈必數大。洪大傷氣。細數傷血。此證禁發汗。利小便。當導流濕潤燥之法。宜河間黃連湯。

### 燥火

燥火之證。內熱煩燥。口燥舌乾。腹痛頻併。膿血稠粘。枯涸難下。肛門熱痛。小水全無。夜臥不寧。此燥火痢也。熱結膀胱。燥傷太陽也。口燥唇乾。燥傷陽明也。寒

熱口苦燥傷少陽也。燥火傷氣則白。燥火傷血則赤。赤白兼下。氣血俱傷。脈必洪數。浮數傷表。沉數傷裏。洪數傷氣。細數傷血。浮沉皆數。氣血兩傷。燥傷血分者。當歸大黃湯散。熱清燥次。用當歸銀花湯。燥傷氣分者。枳殼大黃湯合益元散。

### 瀉痢

瀉痢之證。並無虛坐努責。惟覺倦怠。若滯下則不然。或膿或血。或赤白兼下。雖有痛不痛之異。然皆裏急

總之拘泥  
不得在疏  
症時細審  
為妙

後重。考之於經。似云屬熱。近來涉歷。竟有大虛大寒者。不可不知。河間丹溪。專用苦寒。未為允當。大抵治瀉痢。當宗仲景之法。可溫則溫。可下則下。或散表。或利小便。

瘧痢

世有瘧後痢。有痢後瘧者。夫既為瘧後。表邪發泄已盡。必無暑濕之毒。何故復為痢疾。曰。此因表邪內縮。或有元氣下陷。脾氣不能升舉。似痢非痢也。既為痢。

非解人不  
能道此

後下多亡陰。氣又隨痢而下。陰陽兩虛。陽虛則惡寒。陰虛則發熱。故寒熱交作。似瘧非瘧也。俱作虛論治。宜補中益氣湯。生生子云。瘧痢發燒。過吞生冷。變爲痢疾。有痢未愈。繼之以瘧。宜十味六和湯。喻氏謂瘧疾變痢。乃少陽生發之氣轉陷。不若當從少陽。俾蒼天清淨之氣。足以升舉水土物產之味。自然變化精微。轉輸有度。而無下痢奔迫之苦矣。蓋胃受濕熱。水穀從少陽之火化。變惡濁。而傳於大腸。不治少陽而

治陽明無益也。活人書云。瘧痢之證。皆因內蘊有形。濕熱之積。失於表散。外邪陷裏。則自瘧變痢。或邪從外洩。則自痢變瘧者。有之。

噤口痢

噤口痢者。乃胃中濕熱之毒。薰蒸清道。以致胃口閉塞。而成噤口痢。亦有誤用兜澀之藥。邪氣停留於胃中者。亦有專用苦寒而傷胃氣不食者。蓋黃連雖治濕熱之藥。苦而且降。但不能開提。况非胃虛所宜治。

謹能藥到  
此處

者不可不察。景岳曰：噤口不食，乃危險之候。丹溪謂胃熱故也。善用人參黃連，不知噤口食不能入，雖有熱實證，而惟脾胃虛寒者居多。若因食積停滯，胃中而噤口者，胸腹必有脹滿，當行滯消積。青陳查朴之屬，有因火鬱胃中而噤口者，臟腑必多熱熾，脈見洪數。此當瀉火去熱，邪去而食自進。如芩連梔柏之屬，凡邪蓄於中，乃噤口之實證。而近世之病者，每察胃口多無脹滿等證，但見其有出無入，以臟氣不能容。

受也。其故有二。一由脾胃之弱。是以嘔惡吞酸。或惡聞食氣。此中焦不運。故食不能入。責在脾也。一由腎氣之弱。命門不能暖。此大腸不能固。小腸不能化。胃氣不能行。是以下焦失守。而化源無主。責在腎也。欲健脾。非參朮乾薑甘草之屬。不可欲實下焦。非桂附熟地吳萸之屬。不可。脾腎強而食自入。如丹溪之用黃連。悉以實爲言。特一曲之見耳。不可信以爲然。張三錫謂噤口下痢。惡心不食。古方悉云胃虛有火。然

此條奇  
聚看

亦有宿食痰火挾熱因下焦不通泛上而嘔者不可  
不辨。如有食滯胸膈必脹宜消導切忌苦寒如脈洪  
而弱胃中有火古方用薑汁炒黃連人參湯與之如  
脾胃不弱頭痛心煩手足溫熱未服苦寒者乃毒氣  
上攻所以嘔而不食宜敗毒散加陳米薑棗如氣口  
脈數有力二陳湯加薑汁炒黃連竹茹外臺秘要噤  
口不食雖曰胃虛亦有熱毒閉塞心胸間也宜茯苓  
白朮散加石菖蒲倉米俟其胸次一開自然思食矣



參到早用  
苦寒得其  
實美

陳遠公用活田螺搗爛。加冰片麝香少許納臍中。引  
熱下行。此一開下降之法。最妙。羅仙謂噤口痢疾。却  
有兩端。或濕熱邪克。或早用苦寒。若用暑熱之邪拒  
格。三焦者氣機逆傳。而閉上下。渾如兩截。治不得其  
要。則邪無出路。頃刻消亡。治宜半夏瀉心湯。去甘草。  
取其補以運之。辛以開之。苦以降之。最爲允當。高鼓  
峯曰。噤口之痢。毒氣原盛。或用破氣苦寒太過。或用  
蕩滌之藥。挾傷上中二脘。宗氣邪毒乘虛而上逆也。

# 休息痢

喻氏曰休息痢。乃乍作乍止。或因邪氣未曾滌盡。遂止而復發者是也。或愈後恣食厚味。及妄作勞。皆能致此。金匱云。下痢已瘥。至期年月日時復發者。以病不盡故也。當下之宜大承氣湯。或曰休息痢止而不止。正氣既虛。邪復不盡。未可言下。曰此證止之已久。其正已復。其積未除。故須下之。證因脈治云。休息之痢。久久不愈。或暫好一月半月。旋復發作。纏綿不已。

此非確論  
宜消補兼  
施爲妥

總之食復  
色復二累  
爲多當以  
扶元固本  
爲主議論  
紛紛諸方  
雜出在明  
眼人自有  
主張耳

大抵堯涇太早。或飲食失宜。或勞動房勞。皆能致此。或外感失於解表。或用寒涼抑遏。或早食厚味助其邪氣。而休息痢成矣。其脈見瀉。氣凝積滯。和氣四七湯。或見沉滑。食積未徹。行積香連丸。或見沉數。內有積熱。潑火湯。或見沉弦。脾傷氣血。法當助脾消積。枳朮丸。合保和丸。臞仙云。休息之痢。惟以補中益氣湯最穩。活人書云。休息痢。經年不愈。緣初起失於通利。致濕熱之邪。留於衝任之間。日久則氣血愈陷。而清

論極透徹  
無如今之  
治休息痢  
者都不如  
培補脾胃  
元氣也

氣不升故綿遠不休只宜調氣和血培補脾胃元氣  
若徒事消導非徒無益而又害之矣可不慎歟此證  
衝任雖病幸與脾胃無碍故飲食如常所以久而不  
死慎勿疑於清熱消積也蓋經年累月之痢每日所  
下皆有膿血豈熱化為膿可以久延如此乎此其非  
膿也明矣既知非膿安得云為熱緣臟腑受傷而致  
脂膏不固隨剝隨下所以如此若不安養臟氣再以  
苦寒治其痢或再用蕩滌以去其積則臟氣日敗必

至於死。今之治痢多危者。率受此害。臨症者其察實病情以施治也。

### 下痢純血

下痢純血者。風也。治宜涼血活血祛風。當歸黃芩桃仁防風之類。如風邪下陷者。升提之。濕熱傷血者。行濕清熱。如下墜異常。積中有紫血塊者。是死血。桃仁滑石行之。血痢不愈。屬陽虛陰脫。治宜八珍湯加升舉之藥。甚有陣陣自下。手足厥冷。脈漸微縮。此爲元

臨此等症  
續有胆識  
乃不誤事

肝藏血而  
脾統血何  
可不與脾  
同治乎

氣欲絕。宜用附子。理中湯。稍遲不救。

活人書云。暑毒陷於衝脈。其血傷於熱而不和。故下

鮮血。散血。或紫黑瘀血。或痛或不痛。其脈滑數。血養

相兼易治。脈弦急。或濇數。或空弦搏大。血自血。養自

養。難治。此肝經之血病。與脾同治。方安準繩云。下血

色黯如瘀。服涼藥而所下愈多。所去愈頻者。當作冷

痢治。宜理中湯。兼四物。加肉果木香。或加減平胃散。

諸血痢。宜以千金膠饘湯。易簡云。血痢當服胃苓湯。

血病而脈  
不病者此  
為極效

膠艾湯之類。心經伏熱下血。犀角磨汁半杯。硃砂研末二錢。人參末三錢。牛黃三分。寒食麴糊丸。如麻子大。每服五六分。燈心龍眼湯送下。脾經受濕下血。蒼朮地榆湯。如血痢。腹不痛而無後重。用炒槐花。炮薑。或丸或煎。治血痢神效。王肯堂謂赤痢必先清血。當歸丹皮銀花查炭麥芽桃仁之類。久不愈。帶補兼收。切忌用澀藥。宜芎歸芍地白朮地榆五味甘草之屬。景岳云。血痢久。胃弱血虛。脾經血熱下注而不愈者。

宜四物湯加朮苓。如飲食不進發熱作渴。勢甚者十  
全大補湯。不應送下二神丸。如脾經氣虛不能統血  
而不愈者。用四君子加芍歸。如中氣下陷不能攝血  
而不愈者。宜補中益氣湯。經云腸澼便血。身熱則死。  
寒則生。蓋腸胃受病。更見表證。則內外俱困。陽無所  
依。故云身熱則死。寒則生。腎脈搏沉。爲腸澼下血。血  
溫身熱者死。心肝澼亦下血。二臟同病者可治。其脈  
小沉澼爲腸澼。其身熱者死。血溫身熱。不出七日死。



也。醫通云。血痢初起。腹痛併迫。脈見數大。身有微熱。小建中湯和之。純下鮮血濃厚者。此心脾伏熱也。大黃黃連瀉心湯有積。枳朮丸加厚朴木香元胡。風入腸胃。純下清血。或溫毒下血。俱用胃風湯加荊防枳殼。生生子云。傷風而下清血者。宜祛逐之。風傷肝。肝藏血。故下鮮血者。風也。古謂下痢純血者死。此亦要察脈。參證未必盡死。余治千人。皆活用佛手散。加阿膠炮薑炭蒲黃地榆秦艽黃連之類。或四物加阿膠。

艾葉之屬不可純用苦寒之藥。衍義云：地榆性沉苦寒，熱痢下血可用。陰虛下痢切不可用。

### 下痢白膿

白屬肺金，此氣受病也。統旨云：痢之白者不可盡歸虛寒，然亦有虛寒挾熱者。河間以爲一出於熱，余攷內經是寒多而熱少也。古者謂赤爲熱，白爲寒，此大謬也。醫通云：白痢初起腹痛，後重不食，當審其虛實。寒熱如小便清利爲虛寒，宜用二朮湯加炮薑、厚朴。

知明廣

木香砂仁以調其氣。又能蕩滌痰積。凡見白膿。法當調氣養臟。白膿者。並非糟粕所化。實臟腑之脂膏。不可妄投消尅之品。又不可誤用血藥。恐邪入血分。變爲膿血也。

### 凍膠鼻涕

下痢凍膠鼻涕者。爲冷痢。非薑桂之辛莫效。此因過吞生冷。脾胃受傷。氣微而滯。下生焉。醫通云。痢如凍膠鼻涕。或如魚腦。俱是冷證。先用木香。白朮。白朮。厚

用此法次第施之自無不效

此條講五色病甚明晰可以包一切症

朴砂仁次用理中湯加木香。如不應加訶子皮粟殼之屬。指掌云。痢如魚腦。乃脾氣不運。陳積滑脫。下凝也。如鼻涕凍膠者。臟腑虛冷而滑脫也。如久痢所下凍膠鼻涕。脈必遲弱。形體虛怯。四肢疲倦者。除濕湯下痢五色

痢有五色之辨。如下痢腸垢之屬。無非氣之所化也。但白者其來淺。浮近之脂膏也。赤者其來深。由脂膏而切膚絡也。純下赤者多以血爲熱。迫故隨溢。隨下

此則最深者也。若紫紅紫白者，則離位稍久，其下不速而色因亦變。或未及脈絡，此其稍淺者也。大都純血鮮紅者，多熱證；以火性速，逼迫而下也。紫紅紫白者，少熱證；以陰凝，血敗損而然也。純白者，多寒證。臟寒薄滑而然也。又有黃黑二色，則色深而穢，臭者爲熱證，亦有寒者。若淺黃色，淡不甚臭者，此卽不化之類，皆寒證也。黑而膿厚，大臭者，多火證。若青黑而腥薄者，此肝腎腐敗之色也。不治夫瀉痢出於臟，無不

可謂洞見  
五臟病源  
矣

本於脾胃。脾胃有傷。五氣皆能犯之。故凡赤者。脾心證也。兼青者。脾肝證也。兼白者。脾肺證也。兼黑者。脾腎證也。正黃者。本臟證也。若脾兼心火。乘土也。脾兼肝土。受尅也。其土敗壞。非火也。脾兼腎水。反尅也。其土多寒。非火也。以脾兼肺母。氣泄也。其土多虛。非火也。本臟自病。脾受傷也。其土多濕。非火也。此兼證之盛衰。其順逆如此。凡脾腎之強者。有實熱。脾腎之弱者。皆虛寒。故臨證者。必深辨乎此也。

痢證匯叅卷之三

海虞吳道源本立纂輯

同里

王式金聲谷評定

劉文思庭輝叅訂

門人

王天瑞希范

同校

龔錫勇天表

下痢口渴

瀉痢之證。下多亡陰。必多口渴。庸者認以爲火。妄投

分析清楚

清火之藥而不知有火。故渴無火亦能發渴。不可不辨也。如火盛於中。則薰脾燬胃。津液耗乾。喜飲冰水。多而不厭。愈涼愈快。隨飲隨消者。此因熱而渴也。治宜涼之。如口乾作渴。雖飲水而不能多者。此非真火。不宜涼也。亦有口雖乾渴。喜熱而不喜涼者。此寒聚於中。而無根之火。浮載於上。卽是假渴。乃口乾也。非渴也。夫瀉痢之證。因其水泄下。必津涸於上。故不免於渴。緣內水不足。欲得外水以相濟也。務必察實病。



情方可施治。有火者清之。不足者當滋陰。而滋陰之法。莫先補氣。昔人云。氣之升而卽爲水。氣爲水。母氣充焉。而渴卽止也。經云。亡液者渴。亡陰者煩。煩渴之證。未必盡以爲熱也。渴而多飲爲上消。肺熱也。手陽明大腸之津。消則口黃口渴。是津不足也。宜消渴飲。喻氏曰。胃者腎之關也。胃熱下傳於腎。則關門大開。心之陽火。得以直降於腎。燥不能需。以犀角黃連治其下降之陽光。服之神效。仲景云。下痢不渴者裏寒。

也。渴者陽邪入裏。心煩不眠。知挾熱也。如咳而渴。嘔胸有停飲也。渴而下痢。小便必不利矣。宜猪苓湯。李士材曰。陽明外熱發渴。則用柴葛解肌。陽明內熱。則用承氣以攻下。此云胃實。非有停滯。然火旺則金囚。宜以竹葉石膏湯直入戊土而清其中。三焦火平。則炎蒸退而津液生焉。

色如豆汁

下痢色如豆汁者。乃太陰經受濕也。嚴用和云。傷濕

而下豆汁分利之。劉宗厚云：濕喜傷脾，因脾胃為水穀之海，無物不受，常兼四臟。蓋豆汁之色如五色之兼者，濕也。

### 下痢腹痛

夫下痢腹痛，有寒熱虛實之不同，不可不辨。如實熱者，或因食積，或因火邪，食積之痛必多脹滿，痛而拒按，治宜消導；火邪之痛必然喜冷畏熱，宜清利之邪。猶不可不辨此條，而金針畢度。

寒之痛多由寒氣之在臟也。經曰：痛者寒氣多也。其寒故痛也。又曰：痛者陰也。或吞生冷，或受寒氣，皆能致痛。寒在中者，治宜溫脾；寒在下者，治宜溫腎。蓋痢疾不止，胃氣受傷，膏血切膚，安得不痛？此其爲痛，乃因痢及腸臟而然。懼按爲實，喜按爲虛。欲飲冰水爲熱，喜暖手熨者爲寒。或謂痛無補法，直待痛止方可補耳。而不知元氣日去，終無定期。執而不悟，愚亦甚矣。法當順氣和血，木香、歸芍之類。寒在下焦而痛者，

必用桂附吳萸。此一定不易之法也。病機云：腹痛者，宜和。如氣鬱結不行而痛，宜順氣開鬱。挾寒者，溫中湯。挾熱者，黃芩芍藥湯。因積滯而痛，木香導氣湯。血虛而痛者，當歸芍藥湯。亦有肺氣不通而痛，以苦桔開之。仲景用紫參湯治肺氣不通而痛。丹溪謂下痢腹痛，用薑附溫散之法。建中湯加乾薑是也。東垣云：太陰陽明腹痛，下痢常泄。若不泄，卽閉結而難通。作濕熱毒，或下鮮血。腹痛脇下結縮，脈緩而洪，弦中按。

指下得重按則空虛是也。河間云。下痢腹痛大便膿血。或爛肉汁者。此寒毒入胃。宜四逆理中湯加附子。景岳云。腸澼下血。出而有力。四散如篩。腹中大痛。乃陽明氣衝熱毒所作也。當以升陽去濕和血湯如下瘀血。腹中痛。腹皮惡寒。右手關脈弦。按之無力而喜熱物熨之。則內寒顯然矣。宜用益智中和湯。如頭悶勞動則腹微痛。不喜飲食。四肢倦怠。躁熱短氣。口不知味。大便溇泄。渴不喜冷。人參益胃湯。郭志鑑云。下

此治痧痢  
腹痛要法

痢血水腹痛非常。脈見遲數不勻。或時歇止。此痧痢腹痛也。乃刮其痧。痛即減半。宜沉香阿魏丸砂仁湯待冷服之。其痛立止。

### 下痢不食

下痢不食。莫作噤口。大抵飲食過飽。脾虛不運者。居多。或生冷失宜。腹滿飽懣。以致飲食不入。法當消導。保和丸之屬。局方發揮云。下痢不食。三部脈皆平。按之心下堅者。急下之。乃安。如下後心下堅痛。脈遲。此

寒也。宜溫之。理中湯之屬。吳鶴皋云。下痢不食。大抵積滯未淨。傷於飲食。脾不運化。滯於腸胃。惟以和平之品。消而化之。宜保和丸最穩。

下痢作嘔

下痢作嘔。嘔嘔欲吐。或聞穀氣。卽見惡心者。此胃氣虛寒。不能容受。而然宜安胃溫補。或四君子煎。或六味異功散。聖朮煎之類。如嘔而甚者。宜六味回陽飲。若陰中火虛。氣不歸元而嘔者。宜胃關煎。或理陰煎。



金匱要略  
症施之

如胃火上冲而嘔者必有煩熱脹滿。治宜清降火邪。  
大分清飲益元散之類。統旨云痢而嘔者胃氣不和。  
也。宜生薑陳皮白朮湯。因火上逆而嘔者加薑汁炒。  
黃連。虛者加參朮。如積滯毒氣上攻而嘔者。木香導  
滯丸。陰陽虛者。四物湯加參苓朮栢陳皮。病機謂痢  
而嘔者胃寒也。有胃中火逆而嘔者有毒氣上攻而  
嘔者有胃虛而嘔者。治宜細審。切勿忽畧誤事。大率  
久痢見之爲逆。保命集云痢而嘔者胃不和也。上焦

治久痢  
嘔者此為  
正法

此法亦可  
用第恐  
胃氣將絕  
者併椒梅  
等味不能  
下咽耳

不和治以生薑陳皮中焦不和治以歸芍桂苓下焦  
不和治以故紙吳萸甚則酌用桂附舍此更無他法  
汪忍菴曰太陰自痢不渴寒多而嘔腹痛便溏脈沉  
無力治宜理中湯自痢渴者為熱不渴者為寒嘔而  
腹痛便溏皆寒所致也陶仲文治胃寒嘔惡吐虵用  
理中湯去甘草加茯苓川椒烏梅蓋虵得甘則動得  
酸則止得辛則伏故用川椒烏梅蓋下痢嘔惡吐虵  
者有之以備參攷仲景治腹痛下痢四肢厥冷面赤

仲景治法  
要略

煩躁乾嘔咽痛脈沉細欲絕面赤發嘔此陰盛格陽  
寒留胸中故得食卽吐虛火上炎故咽痛治以四逆  
湯加附子乾薑甘草用葱九莖以通陽氣腹痛加白  
芍以斂其陰咽痛陰氣上結也加桔梗脈不出加人  
參以助陽補氣嘔甚加生薑以散逆氣

### 下痢呃逆

丹溪以呃逆爲氣從下衝上屬火之象第古方悉以  
胃弱言之夫胃弱爲虛甚久痢多見此證乃因痢久

而。下。多。亡。陰。也。昔。有。一。人。質。弱。多。怒。因。飢。索。食。不。遂。  
忽。得。瀉。痢。口。渴。七。八。日。後。發。呃。逆。以。人。參。白。朮。煎。湯。  
調。益。元。散。服。之。乃。安。此。虛。熱。之。治。古。法。橘。皮。竹。茹。湯。  
專。治。氣。逆。發。呃。此。火。呃。之。通。劑。也。如。虛。寒。而。呃。者。丁。  
香。柿。蒂。湯。亦。有。積。滯。阻。遏。氣。機。而。呃。逆。者。余。治。日。茂。  
店。潘。仁。輝。下。痢。無。度。飲。食。不。思。七。日。後。呃。逆。諸。藥。不。  
效。以。導。滯。丸。五。分。服。之。稍。減。次。日。又。服。三。錢。米。飲。送。  
下。乃。安。此。則。積。滯。未。淨。毒。氣。上。冲。而。發。呃。也。總。之。呃。

逆由來。殊非一轍。治之者。切勿傷其胃氣。寒則溫之。熱則清之。虛則參朮補之。使之能進飲食。而病已半瘳矣。

詰語

戴元禮云。下痢詰語。內有燥屎也。小承氣湯主之。內經云。痢而詰語。下之乃安。

裏急後重

痢之裏急後重。病在廣腸最下之處。不在脾與腎也。

凡痢無不裏急後重

者治法已  
詳前兩卷  
中矣

無論寒熱虛痢。皆有是證。不得盡以爲熱也。蓋中焦有熱。則熱邪下迫。中焦有寒。則寒邪下迫。脾腎氣虛。則氣陷下迫。欲治此證。當察其因。以治脾胃之本。則無不愈矣。痢止。則後重自除。未有痢不愈而後重能愈者。故凡治此者。當以治痢爲主。滑伯仁曰。裏急腹痛。急迫後重。肛門下墜。惟其裏急後重。數至圕而不便也。證治要訣云。下痢後重。白頭翁湯主之。彙補云。裏急後重。不及更衣者。火也。火性急速。能燥物也。裏

急而頻見更衣者。虛也。元氣脫滑。不禁固也。宜補中  
益氣。加訶子皮。此證大抵脾胃不和。或爲風寒暑濕。  
令氣濁所干。積滯膠固。纏墜。或久痢陽氣下陷。皆能  
致此。治法宜升陽益胃。

### 小便不利

瀉痢之證。必多小便不利。或澀或赤。亦有寒熱虛實。  
大有關係。不可不察也。若暴注之瀉。其清濁不分水。  
穀併歸於大腸。故小便不利也。惟其暫矣。痢疾小便

指陳明證

不利。其病本不一。今人但見小便黃赤。無不言其內熱。而誤者多矣。或澀痛。或見鮮血。方是真熱。否則或以真寒逼陽於下也。蓋瀉痢亡陰。而水虧。色變者有之。或下焦陽氣不暖。而水無以化者有之。總是亡陰亡液之證。不得認以爲熱。治宜培補真陰。乃爲良法。經云中氣不足。小便爲之色變。至哉斯言。何今人之不能察也。喻氏謂小便不利。有急開支河一法。其邪如決水轉石。邪熱之在裏者。奔迫於大腸。必鬱結於



膀胱。膀胱鬱結。則氣不化。而小便不利。不用順導而  
逆挽。仍非計也。宜清膀胱之熱。令氣化行。而分消其  
熱勢。則甚捷也。仲景所謂下痢氣者。利其小便。夫氣  
者。膀胱之化也。反從大腸而出。當利其小便。非急開  
支河之謂乎。然而水出高源。肺不熱。則小便自行。肺  
與大腸相表裏。大腸之熱。皆因肺熱所移。尤宜辛涼  
之藥。先清肺之化源矣。金匱謂下利氣者。紫參湯主  
之。本草謂紫參主心腹中積聚。療腸胃中熱。通九竅。

利大小便。仲景取之。固通因通用之意也。

脈見沉洪。小水不利。此陽實陰虛。氣實血虛之候。若洪大至極。甚至四倍以上者。是陰陽離絕。關格之脈也。不治。

凡小水短赤。惟勞倦氣虛。及陰虛之人多有之。若以統作火治。而專用苦寒。則變病有不可測矣。汗下之後。內亡津液。而小便不利者。不可用五苓散。恐重亡津液。而虧其陰也。成無已曰。小便不利。熱

結下焦津液不通也。

糟粕不實

日華子云痢疾已久。糟粕不實。因腸胃虛弱。間或有濕。宜茯苓白朮散。或訶子皮散。異功散之類。丹溪云。下痢積已盡。糟粕未實。當炒白芍。焦白朮。茯苓。陳皮。炙甘草湯下。固腸丸。但固腸丸性燥。恐積滯未淨者。不可遽用。凡痢後糟粕不實。或因食積。或飢甚。方食腹中作痛。以白朮茯苓炒山藥煎服和之。

二法一標  
一本須看  
本體之強  
弱而施之  
不可偏執  
也

# 下痢身重

喻氏謂下痢身重。乃脾腎大虛。腹脹喘急。四肢浮腫。小便不利。土為萬物之母。此脾虛土不能制水。水為萬物之源。腎虛水不安其位而妄行。以致汎濫皮膚。肢體之間。治宜加味腎氣丸。加附子為君。蒸動胃氣。其開始開胃中積水。始下。生子曰。身重不知穀味。下利如豆汁者。乃足太陽脾經受濕也。東垣用升陽除濕防風湯。或用升陽益胃湯。局方用羌活勝濕湯。

正法

治濕熱在表頭痛身重。用羌防梹本獨活川芎葛根。皆風藥也。使濕從汗而解。諸邪俱散矣。

痢後浮腫

下痢遍身浮腫。乃脾虛有濕。用五苓散倍加白朮肉桂升麻。立效。景岳治痢後虛浮。用六君子加木香肉桂。或金匱腎氣丸。東垣治此證發寒熱者。用柴平湯加茯苓山藥。

痢證滙叅卷之四

海虞吳道源本立纂輯

同里

王式金聲谷評定

劉文思庭輝叅訂

門人

王天瑞希范

同較

龔錫勇天表

下痢大孔腫痛

喻氏云。肛門腫痛。熱流於下也。初病身熱脈洪大宜。

辨其虛實  
最是

清之。黃芩芍藥湯。久病身冷自汗。宜溫之。理中湯。王  
肯堂曰。大孔腫痛者。濕熱下流所致。實者清之。黃連  
黃芩炮薑。脈滑有力。中有熱也。虛寒者溫之。宜養臟  
湯。專治日久大孔痛。張景岳謂大孔痛者。皆因脾胃  
不利。則水失其正化。而濁污難堪之味出。諸孔道比  
痛楚之苦。不能免也。緣火爲痢。陷陽爲陰。遂并逼於  
下。無從解散。此腫之所由生也。所以痢多則痛多。痛  
與否。亦由氣之陷與不陷耳。故無論冷熱之痢。大孔

總論

凡要為

皆能爲痛。不得謂痛盡由熱也。治者但治其痢。痢止則痛自除。亦如治後重之法也。大凡治肛門腫痛。但知火能腫痛。不知元陽之下陷也。丹溪治下痢日久。大孔腫痛。用檳榔。芩連。炮薑之屬。亦分寒熱治之。熱者。艾蠟。訶子。燒烟薰之。寒者。炒熱鹽熨之。又用瓦片敲如錢大。燒紅。淬童便中。急取起。將綿紙包好。熨痛處。其時天寒。恐外寒乘虛入也。參歸陳皮煎湯飲之。

下痢脫肛



脫肛一證最難爲藥。熱則肛門閉。寒則肛門脫。用磁石爲末。每服二錢。食前米飲調下。外以鐵銹磨湯溫洗之。王肯堂治一老僕。脫肛日久。復下痢。因天氣已寒。衣蓋又薄。寒侵形體。不禁而腸頭下脫者。寒也。滑也。真氣不禁。形質不收。乃血脫也。此乃寒滑氣泄。不固形質下脫也。當以澀去其脫。而除其滑。以木熱之劑。除寒補陽。兼以補氣之藥。升陽益氣。以微酸之味。固氣上升。名曰訶子皮散。一服減半。再服全安。本事。

此二法最穩

得之行房者爲更重徒用治標藥恐不濟事也

方用酸石榴連皮搗爛塗於臍外以帛蓋之將白布束緊內服補中益氣湯其腸頭自收屢驗

### 痢後風

因痢後不善調攝或遠行或久未行房而盡力皆下遍體汗流而久病之弱質毫竅疏豁則風邪乘虛內侵皆能致此其症兩腿酸軟腫痛或麻痺不仁或筋脈結促宜用防風湯加羌活秦艽續斷虎骨

### 痢後枯細

續知痼後  
枯細總由  
氣血兩虛  
調攝未當  
所致治者  
只開胃進  
脾使之飲  
食如常而  
四體亦如  
常矣不必  
別生議論  
也

枯細之證。此惡血流入經絡。血受濕熱。久而凝滯。所  
下未盡。留滯墜道。所以作痼。經久不治。則成枯細。兩  
腿肉消。蓋膝腫痛。治宜四物。加桃仁紅花。牛膝陳皮  
煎。沖入薑汁。服潛行散。再以滾煮酒過口。張三錫曰。  
痼後兩腿漸細。不治。則成鶴膝風。用蒼朮二兩。白芍  
龜腹版各二兩。鹽水炒黃柏二兩。粥糊丸。以四物湯  
加陳皮炙草煎湯送下。氣虛加參朮。甚者用防風湯

陰虛下痢

有素患陰虛。偶感寒邪。腹痛下痢。裏急後重。赤白稠粘。或見血水。發熱夜甚。煩渴不寧。胸中似飢。得食則脹。治宜清解熱邪。兼滋陰血。庶可保全。設用涼藥。攻積補氣。破氣治之。必死。宜白芍丹皮生地山藥桔梗石蓮茯苓陳皮。風米之類。趙養葵曰。陰虛自痢者。卽五泄中痼泄也。經曰。裏急後重。數至圊而不能便。必莖中痛。褚氏曰。陰已耗而欲竭之。則小便牽引而痛。愈便則愈痛。其證赤白相兼。後重裏急。悉似疫痢。必

此理不可  
不明

言之歷歷  
如掌上觀  
紋

透徹語

小便短澀而痛。或欲小便而大便先脫。或欲大便而  
小便自遺。急以八味丸加故紙肉果阿膠兼用理中  
湯加升麻桂附相繼間服。世有服痢藥而死者。不可  
枚舉。張景岳曰。陰虛之病。有形體薄而顏色青白者。  
有脈雖數而無力無神者。有脈見真弦而少虛似實  
者。有素稟陽衰者。有素多淡素者。有犯生冷者。有偶  
中陰寒者。有年衰神弱者。或食生冷偶傷胃氣而成  
滯下者。果何積之有。又何熱之有。大都脾弱之輩多。

有此證。故治此者。只宜溫調脾腎。俾脾溫。則寒去。卽所以逐邪也。卽用溫補健脾。原無妨碍。切不可妄云補住邪氣。而用攻積清火等藥。脾氣再傷。多致不救。

### 疫痢

疫痢之證。運氣所致。或流衍之紀。雨濕連綿。或二火司令。赫羲用事。濕熱大作。或燥金行令。燥火時行。三者皆成疫痢。此所謂之天行疫痢也。脈多濡散。或見微遲。或伏。或散。脈微者。用人參敗毒散。脈自起。燥火

脈數者當歸銀花湯。病機云。時行疫痢。長幼相似。能傳染者是也。宜審寒溫。分別表裏而治。其初起有外證者。敗毒散表證除。當清熱消積。吳又可曰。疫痢者。大腸事也。大腸病。失其傳送之職。故正糞不行。純乎下痢膿血而已。所進穀食。停積胃中。直待大腸邪氣將退。胃氣通行。正糞自此而下。今大腸失職。正糞不行。又何能與胃載毒出外。羈留在胃。耗氣搏血。尤爲喫緊。宜用檳榔順氣湯。繆仲淳曰。疫痢之證。沿門闔

是活時疫  
辨要旨

境俱患痢疾。發熱頭疼。口渴煩燥。或夾癰疹。下痢瀉。庸工指爲漏底傷寒。殊不知疫痢使然。緣今人之稟質薄弱。積感厲氣之所致。治宜清熱解毒。表散爲急務。如羌獨柴葛之類。如有別證夾雜。以意加減。全在活潑。

### 痧痢

郭志鑑云。痧痢之證。先瀉後痢者居多。蓋因腸胃空虛。穢氣易觸。則成痧痢。或天氣炎熱。或時行疫痢。感



治有次序

觸腸胃因積而發亦致痧痢夫痢不兼痧積去便痊  
痧不兼痢括放卽愈痧積兼全腹必疔痛非常只治  
其痢腹痛不止藥之不效以致延綿日久陣陣作痛  
久則變爲休息疔痛仍在務必先治其痧兼消其積  
則痧除積去痛止而痢除矣如脈洪大不勻此氣未  
清痧毒尙盛也令其胸背括痧俾氣血流通痛止而  
痢漸愈矣宜當歸枳殼煎沖入童便待冷服之次用  
蘇木紅花靈脂茜根當歸烏藥香附赤芍以導其瘀

乃安。

蟯虫痢

胃弱腸虛則蟯虫下。乘或痛或癢。從穀道中出。其形極細。乃九虫之一也。治宜清熱殺虫。

虫疰痢

痢下黑色。形如雞肝。口燥大渴。五內切痛。由服金石湯丸損傷真陰所致。其血自百絡而來。大抵好色之輩。都有是證。如初起發熱頭疼。表證見者。卽宜發散。

所謂風邪內結汗之是也

似痢非痢

東垣所見  
證是

東垣曰。世之似痢非痢者居多。過吞生冷。起居不時。損傷胃氣。則上升清華之氣。反從下降。以致飧泄。久則太陰傳少陰。而爲痢疾。裏急後重。赤白相錯。宜補中益氣湯爲主。使升降之道行。其痢不治而自止矣。如用溫補仍不治者。又當別治。經曰。熱之不熱。是無火也。無火者。益火之源。兼補命門之火。以生脾土之

古人醫案  
皆知明處  
當治驗歷  
歷可尋非  
如指南所  
載之難爲  
典要也  
勝此知噤  
口痢之多  
由藥誤矣

母此萬舉萬全之策也。

附寓意草似痢非痢種種不同治法

胡太夫人偶然腹痛不寧瀉痢數行醫以痢疾治之。  
其痢轉多更用通因通用之法用九製大黃丸三成  
下之遂擾動胃氣腹脹全不思食有似噤口痢疾狀。  
余診之六脈皆沉而伏應指模糊亟曰此非痢疾證。  
乃誤治之證也。今但安其胃不必治痢而痢自止不  
必治脹痛而脹痛自止。於是用四君子湯爲主復加

薑寇暖胃之藥。用之二劑。痢果不作。但苦胃中脹痛不安。本欲加行氣之藥。使其脹消痛止。而速得進飲食。或曰。寧可消其食。不可急其氣。蓋以前因藥誤引動胃氣。作楚。若加行氣。則脹滿必無紀極。堅持前說。卽用陳皮和之。亦須炒。而又炒。絕不可惹動其氣。凡五日未得大便。亦不惹動。其便聽其緩疾。痛止。脹消。則進食便利。至七日安痊。

張仲儀初得痢疾。三五行。卽請往視。行動如常。然得

內傷之脈而夾少陰之邪。余診畢卽議云。此證仍宜一表一裏。但表藥中多人參。裏藥中多用附子。方可無後患。若用痢疾門諸藥。必危之道也。仲儀以平日深信。竟取前藥不疑。然疾勢尙未着也。及日西。忽發大熱。身重如巨石。頭在枕上。兩人始能扶動。人事昏困。舉家忙亂。服完表裏二劑。次早診時。卽能起身。出房再與參附二劑。全安。若不辨症。用藥痢疾門中。幾曾有此治法乎。

周信用年七十三。平素體堅。不覺其老。秋月患痢。久而不愈。至冬成休息痢。一晝夜十餘行。面目浮腫。肌膚晦黑。求余治之。診其脈。數有力。謂曰。陽邪將入於陰之症也。吾以法治之。尙有可愈。明日我自袖藥來而治。於是。以人參、敗毒散本方煎好。用厚被圍椅。上坐。定置火於下。更以布條捲成鷺子樣。放於椅褥上。填定肛門。使內氣不得下走。然後以前藥滾熱與服。良久。又進前藥。遂覺皮間有津津微汗。再漑以滾湯。

以此法治  
之則陽邪  
不入於陰  
而可愈矣

教令努力忍便不得移身如此約二時之候皮見津潤總未乾病者煩躁畏熱不可忍姑令連被臥於牀上是晚去二次已後改用補中益氣湯一晝夜連下三次不旬日而全愈

朱孔陽年二十五歲形體清瘦素享安逸夏月因構訟奔走日中暑濕合內鬱之火而成痢疾晝夜一二百次不能起牀以粗紙襯其褥上頻頻易置但飲水而不進飲食其痛甚厲肛門如火烙揚手擲足躁擾



審清火鬱  
之症此等  
藥亦大見  
切

無奈診其脈弦緊動急。謂曰：此症一團火毒蘊結在腸胃之內。其勢如焚。須在頃刻。若二三日外。腸胃已腐矣。以大黃四兩。黃連甘草各二兩。入砂鍋內。隨滾隨服。服下人事稍寧。片刻少頃。仍前擾煩。一晝夜服至二十餘碗。大黃俱已全化。次日病者再求前藥。余診畢。脈勢稍柔。知病可愈。但用急法。不用急藥。隨用生地麥冬各四兩。另研生汁。以花粉丹皮赤芍甘草各一兩煎汁。大碗嚥之。以其來勢暴烈。一身津液從

之奔竭。待下痢止。然後生津養血。今脈勢既減。則火邪俱退。不必治病。而痢自止。豈可泥潤滯之藥。而不急用乎。服此藥。果然痢止。但遺些少氣沫耳。第三日思食腐漿。第四日畧進陳米湯清汁。緩緩調至旬餘。方能消穀。亦見胃氣存留一線者。不可少此焦頭爛額之客耳。

陳汝明病痢。發熱如蒸。昏沉不食。身重不可言。第三日危急將絕。診其脈。數大。空虛。尺脈倍加洪盛。謂曰。

病原說得  
清楚非一  
知半解者  
可比

易奇而法  
喻氏治病  
有焉此可  
為知者道  
也

此兩病。湊於一時之證也。內有濕熱。與時令外熱相合。欲成痢證。尚不自覺。又犯房勞。而為驟寒所乘。以故發熱身重。不食昏沉。皆屬少陰腎經外感。少陰受邪。原要下痢清白。此因腸中濕熱已蒸成猪肝敗濁魚腦之形。故色雖變而下痢則同也。若用痢門藥一劑。卽刻不救矣。遂用麻黃附子細辛湯一劑。與之表散外邪。得汗熱卽微減。再以附子理中湯連進二劑。熱退身涼。能食。次用黃連理中湯九服。至旬日全安。

明此知病  
爲藥誤者  
多第不得  
有明如喻  
公者爲之  
挽回耳

此爲實心  
濟世可法

浦君藝患痢。有表邪未散。而誤用參朮。固表使邪氣  
深入。又誤服黃連。涼解大黃。推蕩。治經月餘。胃氣不  
運。下痢一晝夜百餘行。一日嘔出黃連。前服藥汁三  
五盞。嘔二三次。後胃與腸并爲一家。內中幽門闕門  
洞開無阻。不但粥飲直出。卽人參濃膏。纔吞入喉。已  
汨汨從腸奔下。危急之中。諸昆玉及內戚俱探余曰。  
此可無恐乎。余曰。在此用藥。便有可恃。吾豈不知疾  
勢之危。但無別人可任。姑以靜鎮之。而殫力以報知。

可傳者外  
間以虛名  
射利不顧  
人生死而  
亦欲著書  
立說者不  
直一哂也

病證匯編

卷四

二

已耳。於是大劑四君子湯煎調赤石脂禹餘糧二末。連與服後其下痢之勢少衰。但腹中痛不可忍。君藝曰。前此下痢雖多。然尚腹不痛。服此而痛增。未可再服矣。余曰。此謂通則不痛。痛則不通之說也。不痛則危。痛則無妨。何樂而不痛耶。仍以前藥再進。俟勢已大減。纔用四君子倍加茯苓十餘劑而全安。

痢證匯編卷四終